

214

Ammentos de monte.

De sa rocca millenaria,
 sutta sos alinos naschidas,
 friscas sorgentes falant
 a jossu canterinas,
 in urvidos et crastos,
 su granitu duru
 picchende et s'arenaria.
 De sa rocca in s'asullu
 s'ave picat su volu
 in fronte a su sole
 de luche imbriaica et altera.
 De sonarzos et trinittos
 sos rintoccos ritmados
 andant in d'onni situ,
 de monte a sa piana,
 cum sas gamas de ervegghes
 et de 'accas paschende.
 De baccu in baccu
 de sos beccos in belidu
 unu rimbombu 'e corros,
 surdu et cadenzadu,
 rintronat tottu die
 cando benit abrile,
 et su lepore in calore
 a brincos fin' a passiale
 et a sa janna 'e cuile
 ballat su rituale.
 Su rosignolu in s'iliche
 cantat in s'iscuru
 su cantu de s'amore.
 Et deo, ispantau et mudu,
 ascurto et pro tue l'iscrio.
 A s'umbra 'e sos alinos
 cum tecus pasare cheria,
 et de abba cristallina
 tatatare s'anima sidia.
 Cum tecus cantare cherzo
 cuss'antica melodia;
 cum tecus inoche ancora
 jocare su matessi jocu!

F.to Cantonarzu



FABIO ERRIU

SILIUS